



Inatsisartuni ilaasortaq, Anthon Frederiksen  
Partii Naleraq  
/MAANI

## **Qeqertarsuup Tunuani assartuussineq pillugu § 37 naapertorlugu apeqqtinut akissuteqaat**

Asasara Anthon Frederiksen

Qeqertarsuup Tunuani angallanneq pillugu apeqquteqaatinnut, Inatsisartut suleriaasianni § 37 naapertorlugu nassiussannut qujanaq. Akissuteqarnerma kingusinnera utoqqatsissutigaaara.

Matuma kinguliani apeqqtut issuarneqarput, akissuteqaatitaannik malitseqartinneqarlutik.

8. maj 2015  
Sagsnr. 2015-113910  
Dok. Nr. 1961886  
Postboks 909  
3900 Nuuk  
Tlf: 34 50 00  
Email: ISAN@nanoq.gl  
www.naalakkersuisut.gl

### **1. Qeqertarsuup Tunuani illoqarfinnut nunaqarfinnullu mittarfeqanngitsunut helikopter ilaasunik usinillu angallassisut qassiuppat?**

Namminersorlutik Oqartussat Qeqertarsuup Tunuani qulimiguulimik sullinneqarnermut ataasiinnarmik kiffartuussinissamut isumaqatigiissuteqarpoq. Taanna Air Greenlandimut isumaqatigiissutaavoq.

### **2. Helikopteri Bell 212 silarlulaatumi taartumilu angallassisinnaannginneranut suna patsisaava? Atortorissaarutininik amigaateqanngikkaluarpa immaqaluunniit atortorissaarutininik amigaateqarpa?**

Silaannakkut angallannermik aqutsineq tiguneqarsimangimmat, Danmark suliassaqarfimmut tassunga oqartussaasuvoq, taamaattumillu Kalaallit Nunaanni timmisartuussinermut danskit maleruagassat atuutsinneqarput. Air Greenlandimit ilisimatitsissutigineqarpoq, timmisartuussinerit suliassaqarfimmut maleruagassat atuuttut, kiisalu Air Greenlandip ingerlatsineranut quppersagaq, Danmarkimi Angallannermut Aqutsisoqarfimmit, suliassaqarfimmut oqartussaasuusumit akuerineqarsimasoq naapertorlugit ingerlanneqartoq. Timmisartuussinerit timmisartup timmisartuussinermut atortuinut maleruagassat (IFR) imaluunniit isigisat tunngavigalugit timmisartuussinermut maleruagassat (VFR) atorlugit ingerlanneqarsinnaapput. Air Greenlandip Kalaallit Nunaanni qulimiguullit atorlugit sullissineranni VFR atorneqarpoq.

VFR malillugu timmisartornermi appasinnerpaaffissat tassaapput:

	Qullisimatillugu minnerpaaffissaq	Isikkivik
Ullup qaamanerani	500 fod	3 kilometerit

Taarnerani (unnuakkut)	1500 fod	8 kilometerit
------------------------	----------	---------------

Aamma taartumi timmisartornermi tarrat sinerissallu killingi ersissapput.

Matuma siuliani minnerpaaffissanut killiliussat Bell212-inik, S61-imik qulimiguulinnillu allanik VFR atorlugu timmisartornermi qulimiguulinnut tamanut atuupput.

IFR atorlugu timmisartornermi putsut, nittaallat aqqusaarneqarsinnaapput, aammalu tingineri minnermilu isikkivik 1,5 km-iusussaalluni. Kalaallit Nunaanni ukiup annersaani IFR atorlugu timmisartornermi sermernerarpoq. Qulimiguulik timmisartunut suluusalinnut sanilliullutik sermerneranik sunnertiasorujussuuserpoq, qulimiguulinnillu ikittuaraannanguit sermerneranani timmeqqusaapput timmisinnaallutillu.

Aammattaaq Air Greenlandimit ilisimatitsissutigineqarpoq, Bell 212-it pigisatik teknikkikkut atortulersuutunik eqqortunik pigisaqartut amigaateqaratillu. Air Greenlandip IFR, silarlunnerusumi timmisartuussisinnaanermik kinguneqartussaag atorlugu timmisartuussisanninneranut isumannaallisaaneq kisimi eqqarsaatigineqartarpoq. Taamatut eqqarsaatigarneq qulimiguullit amerlanersaannut atuuttarpoq, Bell 212-iinnarmik atuunnani.

### **3. Qeqertarsuup Tunuani angalaniarneq eqqarsaatigalugu arlaatigut sipaarniarfigineqarpat? Aappiuppat sutigut?**

2015-imut aningaasanut inatsisissatut siunnersuummi takuneqarsinnaasutut, 2016-imiit siumut kiffartuussinissamut isumaqatigiissutinut sinaakkutissat ukiut siuliinut naleqqiullutik taamaaginnarput. Tassalu suliassaqarfiup sipaarniarfigineqarnissaa eqqarsaatigineqanngilaq. Kisiannili 2015-imut aningaasaliussat amerlanerulaarput, 2014-imi ukiakkut qinersisoqartussanngornera pissutigalugu sivikitsuarsuarmik periarfissaqartitsilluni kiffartuussinissamut isumaqatigiissutit atuuttut ukiumik ataatsimik sivitsorneqartariaqarsimmata.

### **4. Qeqertarsuup Tunuani angallassinierneq kipiluttunaqisoq akisoqisorlu Naalackersuisunit pitsaanagerusumik akikinnerusumillu aaqqissuussiffigineqarnissaa pilersaarutigineqarpa?**

Kiffartuussinissamut isumaqatigiissutinut neqerooruteqartitsinermit, 2014-imi ingerlanneqartumut atatillugu nuna tamakkerlugu ilaasunik angallassinermi pisariaqartitat misissueqqissaarfigineqarput. Tassani paasinarsivoq, pingaartumik ukiup naanerani Qeqertarsuarmut angallassinierit, maanna umiarsuaq atorlugu ingerlanneqartut ajornartorsiorfiusartut. Kiisalu paasineqarpoq, sapinngisamik sivilunerpaamik imaatigut angallassinissaq kissaatigineqartoq, umiarsuarmut ilaanissaq qulimiguulimmut ilaanissamit akikinnerummat.

Naluneqanngitsutut 2014-imi nutaamik isumaqatigiissusiortoqanngilaq, maannalu isumaqatigiissutinut nutaanut, 2016-imiit atuutilersussanut isumaqatigiissuteqarnissamut tunngavissat suliaralugit ingerlappavut. Suliami tassani Naalackersuisuniit soorunami Qeqertarsuup Tunuani angallassinermut kissaatit eqqumaffigisorujussuugut.

**5. Illoqarfinni nunaqarfinnilu sinerissap sinnerani (Kalaallit Nunaanni) helikopterimik angallassinermut akit qanoq naatsorsorneqartarpat?**

Bilitsimut akiusumut sumunnarfimmut aningaasartuutit tamarmiusut ilaat, aammalu Namminersorlutik Oqartussat sullissisup sullissineranut akiliutaasa ilaat ilaapput. Bilitsimut akiusumit qanoq annertutigisoq ilaassanersoq ullumikkut oqaluttuarisaanermik tunngaveqarpoq. 2015-imi marsimi kiffartuussinissamut isumaqatigiissutit pillugit § 37 naapertorlugu apeqqummut nr. 36-mut, Jess Svane-mut akissutigisanni oqaatigisattut, kiffartuussinissamut isumaqatigiissutit atuuttut 2006-imi isumaqatigiissutigineqarmata bilitsinut akiusut allannguiffigineqarsimanngillat. Tamatuma kingorna akiusunut allannguutaasarsimasunut taamaallaat akinik siumut naliliinerit uuliallu akiinut allannguutit tunngaviusutut oqaatigineqarsinnaapput.

Kiffartuussinissamut isumaqatigiissutit atuuttut 2006-imi atuutilerneranni ilaasoqarnermi kiffartuussinissamut isumaqatigiissutit annertuumik iluarsanneqarnerat tunngavigineqarput, tamatumanilu ilaatigut aningaasaliissutit pingajorarterummik ataatsimik ikilisinneqarput. Taamani sipaarneqartut, ukiumut 100 mio. koruuningajannik amerlassuseqartut ilinniartitaanermut nuunneqarput, siunissamut ungasissumut ineriartortitsinissamut pilersaarummut tapertatut.

Ilaatigut allannguinerup kingunerisaanik assartueriaatsimik ataasiinnarmik tunngaveqartumik atuutsitsisoqalerpoq, tassani angallavimmi ataatsimi assartueriaatsimut ataasiinnarmut tapiisoqartalerluni. Kiisalu assartueriaatsimut allamut nuuttoqaraluarpalluunniit bilitsinut akit annerpaamik 10 procentinik qaffattassasut aalajangiunneqarpoq. Allannguinerup kingunerisaanik Kalaallit Nunaata kujataani siornatigut aamma umiarsuakkut angalasoqarsinnaasimagaluartoq siunissami taamaallaat qulimiguulimmut ilaalluni angalasoqarsinnaalerpoq. Qeqertarsuup Tunuani ukioq avinneqarpoq, taamaalillunilu aasaanerani imaatigut angallassisoqartalerpoq ukiuuneranilu timmisartuussisoqartalerluni. Tamatuma kingunerisaanik aasaanerani ilaasunut bilitsit akikinnerusarput, kiisalu qulimiguulimmut akit akinik qaffaasarnermik qummut killiliinissamik aalajangiinikkut uninngatinniarnaqarput.

Oqaatigineqareersutut kiffartuussinissamut isumaqatigiissutissanut nutaanut, 1. januar 2016-imiit atuutilersussanut isumaqatigiissuteqartoqartussaavoq. Tamatuminnga suliaqarnermi isumaqatigiissutit atuuttut naapertuutinngitsortai Naalakkersuisut tungaanniit eqqumaffigisorujussuuarput. Tassunga ilanngullugu aamma bilitsinut akit misissuiffigineqarsinnaanerit nalimmassarneqarsinnaanerallu, taamaalillunilu akit nuna tamakkerlugu assigiinnerusinnaanerit misissorneqassaaq.

Neriuppunga matuma siuliani allassimasut atorlugit apeqqutitit tamakkiisumik akissuteqarfigisimassallugit.

Inussiarnersumik inuulluaqqusillunga

Knud Kristiansen